

Umsögn dómnefndar
samkvæmt III. kafla laga nr. 50/2016 um dómstóla
um umsækjendur um embætti dómandi og varadómmandi við
Endurupptökudóm samkvæmt auglýsingu í
Lögbirtingablaði 24. október 2025

Reykjavík, 19. desember 2025

EFNISYFIRLIT

1. Umsækjendur	2
2. Sjóarmið sem nefndin byggir mat sitt á	2
3. Málsmeðferð dómnefndar	4
4. Almennar upplýsingar um umsækjendur	5
5. Mat á hæfni umsækjenda.....	8
5.1. Almenn starfshæfni og andlegt atgervi	8
5.2. Menntun og framhaldsmenntun.....	9
5.3. Reynsla af dómstörfum	9
5.4. Reynsla af lögmanns- og málflutningsstörfum	10
5.5. Reynsla af stjórnsýslustörfum	10
5.6. Reynsla af fræðistörfum o.fl.	11
5.6.1. Kennsla á háskólastigi og önnur akademísk störf.....	11
5.6.2. Fræðibækur og -greinar o.fl.	11
5.7. Reynsla af stjórnun	12
5.8. Reynsla af öðrum störfum sem nýtast dómaraefni o.fl.	12
5.9. Sérstök starfshæfni.....	12
6. Færni umsækjenda til að semja úrskurði	13
7. Niðurstaða dómnefndar	13

1. Umsækjendur

Með bréfi 14. nóvember 2025 fór dómsmálaráðuneytið þess á leit við dómnefnd samkvæmt III. kafla laga nr. 50/2016 um dómstóla að hún léti í té umsögn um hæfni umsækjenda um embætti dómara og varadómara við Endurupptökudóm. Embættin voru auglýst laus til umsóknar í Lögbirtingablaði 24. október 2025.

Umsækjandi um embætti dómara er Reimar Pétursson lögmaður og umsækjandi um embætti varadómara er Matthías G. Pálsson lögfræðingur.

Samkvæmt 3. gr. reglna nr. 970/2020 um störf dómnefndar lætur dómsmálaráðherra staðreyna að umsækjendur uppfylli öll hin almennu hæfisskilyrði embættanna sem auglýst hafa verið laus til umsóknar. Niðurstaða ráðuneytis dómsmála var sú að báðir umsækjendur uppfylltu þau skilyrði.

Umsögn dómnefndar fer hér á eftir.

2. Sjónarmið sem nefndin byggir mat sitt á

Samkvæmt 1. mgr. 12. gr. laga nr. 50/2016 skal dómnefnd láta ráðherra í té skriflega og rökstudda umsögn um umsækjendur um embætti dómara. Samkvæmt lögnum skal í umsögninni tekin afstaða til þess hvaða umsækjandi sé hæfastur til að hljóta embættið, en heimilt er að setja tvo eða fleiri umsækjendur jafna.

Þágildandi lögum nr. 15/1998 um dómstóla var breytt með lögum nr. 45/2010. Í athugasemdum við þá málsgrein síðargreindu laganna, er varð að 2. mgr. 4. gr. a laga nr. 15/1998, sbr. nú 1. mgr. 12. gr. laga nr. 50/2016, segir m.a. svo: „Við mat á hæfni dómaraefna er til margra atriða að líta, svo sem starfsreynslu á sviði lögfræði, hvort heldur hún er á sviði dómstarfa, málflutnings, annarra lögmannsstarfa, fræðistarfa eða innan stjórnsýslunnar, en almennt verður umsækjandi að hafa til að bera almenna og víðtæka lögfræðilega menntun og þekkingu. Rétt er einnig að líta til aukastarfa umsækjanda, svo sem til setu í úrskurðarnefndum eða annarra skyldra starfa sem nýtast dómaraefni. Almennt verður að telja umsækjanda til tekna að hafa yfir að búa fjölbreyttri starfsreynslu, þótt meta verði það hverju sinni. Dómnefndinni er einnig rétt að líta til og að leita sérstaklega eftir umsögnum um störf umsækjanda og þess hvort hann sé skilvirkur í störfum sínum og vinnusamur, hvort hann hafi til að bera hæfni til að skilja aðalatriði frá aukaatriðum og setja álit sitt fram á skiljanlegan

hátt, bæði munnlega og skriflega. Er í því skyni unnt að líta til fræðirita, reynslu umsækjanda af málflutningi eða þeirra dóma sem umsækjandi kann að hafa samið. Umsækjandi um dómaraembætti verður enn fremur að geta átt góð samskipti við aðra.“

Í lok 1. mgr. 12. gr. laga nr. 50/2016 kemur fram að ráðherra setji að öðru leyti nánari reglur um störf dómnefndar. Dómsmálaráðherra hefur sett reglur nr. 970/2020 um störf dómnefndar sem fjallar um hæfni umsækjenda um dómaraembætti, en þær komu í stað eldri reglna um sama efni, nr. 620/2010. Í 4. gr. hinna nýju reglna er á sama hátt og í 4. gr. þeirra eldri fjallað um sjónarmið sem nefndin skal byggja mat sitt á. Þar segir m.a.: „Dómnefnd skal gæta þess við mat sitt að samræmis sé gætt þannig að jafnræði sé í heiðri haft. Niðurstaðan skal byggð á heildstæðu mati á grundvelli málefnalegra sjónarmiða og skal þar byggt á verðleikum umsækjenda með hliðsjón af menntun og reynslu, ráðvæðni, hæfni og skilvirkni í starfi [...]. Við mat á menntun, starfsferli og fræðilegri þekkingu skal dómnefndin miða við að æskilegt sé að umsækjandi hafi fjölbreytta starfsreynslu á sviði lögfræðinnar, s.s. reynslu af dómstörfum, málflutningi eða öðrum lögmannsstörfum, störfum innan stjórn-sýslunnar eða fræðistörfum. Miðað skal við að umsækjandi hafi til að bera almenna og víðtæka lögfræðilega þekkingu og menntun. Þá skal litið til þess hvort umsækjandi hefur stundað framhaldsnám [...]. Dómnefnd ber einnig að líta til aukastarfa umsækjanda, svo sem til setu í úrskurðarnefndum eða annarra skyldra starfa sem nýttast dómaraefni. Loks er heimilt að líta til víðtækrar þátttöku í félagsstarfi [...]. Við mat á almennri starfshæfni skal litið til þess hvort umsækjandi hafi sýnt sjálfstæði, óhlutdrægni, frumkvæði og skilvirkni í starfi og hvort hann eigi auðvelt með að skilja aðalatriði frá aukaatriðum. Æskilegt er að hann hafi reynslu af stjórnun. Umsækjandi skal hafa góða þekkingu á íslensku máli og eiga auðvelt með að tjá sig í ræðu og riti [...]. Mikilvægt er að umsækjandi hafi einkamála- og sakamálaréttarfar á valdi sínu og geti farið að fyrirmælum laga um samningu dóma og ritað þá á góðu máli. Hann verður að geta stjórnað þinghöldum af röggsemi og sanngirni og afgreitt þau mál sem honum eru fengin, bæði fljótt og af öryggi [...]. Umsækjandi þarf að eiga auðvelt með mannleg samskipti, bæði við samstarfsmenn og þá sem erindi eiga við hann. Gerð er

krafa um að af umsækjanda fari gott orð bæði í fyrri störfum og utan starfa og að reglusemi hans sé í engu ábótavant.“

Í almennum athugasemdum við frumvarp það, er varð að lögum nr. 45/2010 um breytingu á lögum nr. 15/1998, er áréttað að í öðrum lögum sé einnig að finna ákvæði sem taka verður tillit til við skipun dómara, svo sem í stjórnarsýslulögum nr. 37/1993, lögum nr. 10/2008 um jafna stöðu og jafnan rétt kvenna og karla, [nú lög nr. nr. 150/2020 um jafna stöðu og jafnan rétt kynjanna] og lögum nr. 70/1996 um réttindi og skyldur starfsmanna ríkisins. Enn fremur er þar minnt á að í tilmælum ráðherranefndar Evrópuráðsins nr. R(94)12 frá 13. október 1994 um sjálfstæði, skilvirkni og hlutverk dómenda (On the Independence, Efficiency and Role of Judges) kemur fram að allar ákvarðanir um skipun og starfsframa dómara skuli byggðar á hlutlægum sjónarmiðum og byggjast á verðleikum, með hliðsjón af hæfi, ráðvendni, hæfni og skilvirkni í starfi.

Dómnefnd hefur áður fjallað um í umsögnum sínum hvaða merkingu beri að leggja í þau ummæli 4. gr. reglnanna „að æskilegt sé að umsækjandi hafi fjölbreytta starfsreynslu“ og tekið fram að þetta matsviðmið sé ekki einfalt í meðförum. Einnig að fjölbreytt starfsreynsla umsækjanda geti aukið lögfræðilega þekkingu hans, en slíkt sé þó ekki endilega raunin. Sú ályktun hefur verið dregin af athugasemdum með frumvarpi, er varð að lögum nr. 45/2010, að megináhersla sé þar lögð á lögfræðilega þekkingu umsækjandans. Með fjölbreyttri starfsreynslu sé átt við fjölbreytileika starfa, sem umsækjendur hafa sinnt, en ekki síður hve verkefnin, sem þeir hafa fengist við, séu fjölbreytileg í þeim skilningi að þeir hafi reynslu af því að beita réttarreglum á ólíkum sviðum lögfræði. Þá skiptir lögfræðileg þekking umsækjanda ekki máli, ein og sér, þegar mat er lagt á hæfni hans til að gegna embætti dómara í samanburði við aðra umsækjendur, heldur er einnig nauðsynlegt, eftir því sem tók eru á, að meta færni hans til að nýta þá þekkingu við úrlausn dómsmála.

3. Málsmeðferð dómnefndar

Við meðferð þessa máls hafa Ása Ólafsdóttir, formaður, Helga Melkorka Óttarsdóttir, Jóhannes Sigurðsson og Þorgeir Örlygsson ákveðið að víkja sæti í dómnefnd. Varamaður Ásu, Sigurður Tómas Magnússon, hefur tekið sæti í nefndinni,

sem formaður, ásamt Arnfríði Einarssdóttur, varamanni Jóhannesar, Sigríði Þorgeirsdóttur, varamanni Helgu Melkorku og Ragnheiði Thorlacius, varamanni Þorgeirs. Þá hefur Hjördís Halldórsdóttir, varamaður Reimars Péturssonar, einnig tekið sæti í nefndinni.

Umsækjendum var sent tölvubréf 21. nóvember 2025 þar sem óskað var eftir því að þeir gerðu athugasemdir við sérstakt hæfi framangreindra nefndarmanna teldu þeir einhverjar vanhæfisástæður fyrir hendi. Ekki komu fram athugasemdir við sérstakt hæfi þeirra.

Dómnefndarmönnum voru send gögn málsins 2. desember 2025. Fjallað var um umsögnina á fundi dómnefndarinnar 15. desember 2025.

Í framangreindri auglýsingu frá 24. október 2025 var m.a. áskilið að fram kæmu í umsóknum um dómaraembættin upplýsingar um tvo fyrrverandi eða núverandi samstarfsmenn eða yfirmenn sem gætu veitt dómnefnd bæði munnlega og skriflega upplýsingar um störf og samstarfshæfni hlutaðeigandi umsækjanda. Á grundvelli 5. mgr. 5. gr. reglna nr. 970/2020 sendi dómnefnd spurningalista til þeirra sem umsækjendur höfðu gefið upp sem umsagnaraðila. Umsækjendum var síðan veitt færi á að tjá sig um svör þeirra og hafði nefndin hliðsjón af þessum umsögnum við mat sitt, svo sem nánar verður vikið að í kafla 5.1. hér á eftir. Gerðu umsækjendur engar athugasemdir við umsagnir umsagnaraðila þeirra.

Samkvæmt 8. gr. reglna nr. 970/2020 voru umsækjendum send drög að umsögn dómnefndar með tölvubréfum 15. desember 2025, þar sem þeim var gefinn kostur á að gera athugasemdir við þau til 18. sama mánaðar. Þess var sérstaklega farið á leit í bréfinu að fram kæmi svo fljótt sem kostur væri hvort þeir hygðust gera athugasemdir og að þær yrðu þá sendar sem fyrst. Ábending barst frá öðrum umsækjandanum en hún leiddi ekki til efnislegra breytinga á fyrirliggjandi drögum að umsögn.

4. Almennar upplýsingar um umsækjendur

Hér á eftir verður gerð grein fyrir menntun og reynslu umsækjenda, en 5. og 6. kafli hafa að geyma mat dómnefndar á hæfni þeirra á grundvelli þeirra megin-sjónarmiða sem reifuð voru í 2. kafla. Upplýsingarnar í þessum kafla eru fyrst og

fremst byggðar á umsóknum umsækjenda og þeim gögnum sem þeir létu dómnefnd í té. Ekki er greint frá öllu því, sem þeir hafa talið þar upp, heldur getið helstu starfa og viðfangsefna er þeir hafa sinnt, auk þess sem leitast hefur verið við að gæta samræmis þeirra á milli þegar gerð er grein fyrir þessum atriðum.

Matthías G. Pálsson er fæddur 31. maí 1966 og er því 59 ára. Hann lauk embættisprófi í lögfræði frá Háskóla Íslands 1993. Þá lauk hann LL.M. námi í Evrópurétti og doktorsgráðu í alþjóðlegum samningarétti frá Evrópuháskólanum í Flórens 2001 (sambyggð gráða). Hann lauk diplómanámi í hafrétti frá Rhodos Academy of Ocean Law 2004 og viðbótarnámi í þjóðarétti frá Columbia University í New York 2008. Í júní 2021 útskrifaðist hann með BA-gráðu í ítölsku frá Háskóla Íslands og þá lauk hann diplómanámi í umhverfis- og auðlindafræði við sama skóla í júní 2025. Jafnframt hefur hann sótt ýmis starfstengd námskeið um lögfræðileg efni.

Að loknu embættisprófi í lögum hóf umsækjandinn störf sem fulltrúi og þinglýsingarstjóri hjá Sýslumanninum í Kópavogi og starfaði þar til mars 1994. Hann öðlaðist réttindi sem héraðsdómslögmaður 1994 og hóf sama ár störf á einkaleyfastofu og jafnframt lögmannsstofu í Reykjavík þar sem hann starfaði sem lögfræðingur og síðar lögmaður til 1996. Að loknu doktorsnámi í febrúar 2001 réði umsækjandinn sig tímabundið í starf lögfræðings hjá EFTA-skrifstofunni í Brussel. Í ágúst sama ár hóf hann störf sem sendiráðsritari á varnarmálaskrifstofu utanríkisráðuneytisins í Reykjavík og sinnti því starfi þar til í september 2005. Á árunum 2005-2009 var umsækjandinn sendiráðunautur og lögfræðingur við fastanefnd Íslands hjá Sameinuðu þjóðunum í New York, síðar fulltrúi Íslands í hermálanefnd Atlantshafsbandalagsins í Brussel í Belgíu í rúmt ár, 2009-2010, og í framhaldi af því sendiráðunautur og lögfræðingur í sendiráði Íslands í Brussel 2010-2014. Umsækjandinn starfaði sem lögfræðingur á laga- og stjórnsýsluskrifstofu utanríkisráðuneytisins 2014-2018 ásamt því að vera lögfræðingur og hafréttarsérfræðingur í samninganefnd Íslands í viðræðum um gerð samnings um úthafsveiðar í miðhluta Norður-Íshafsins 2016-2018. Hann var deildarstjóri alþjóða- og öryggismála á samnefndri skrifstofu 2018-2019, fulltrúi utanríkisráðuneytisins í íslensku UNESCO-nefndinni 2018-2020 og fastafulltrúi Íslands gagnvart Evrópuráðinu í Strassborg 2018-2020. Í eitt ár, frá september 2020, var umsækjandinn

formaður starfshóps um landgrunn Íslands og landgrunnskröfur. Hann var aðalsamningamaður Íslands og formaður samninganefndar Íslands í undirbúningviðræðum og samningaviðræðum um gerð alþjóðlegs samnings um verndun og sjálfbæra nýtingu líffræðilegrar fjölbreytni í hafinu utan lögsögu ríkja 2015-2021 ásamt því að vera sérlegur erindreki um málefni hafsins hjá utanríkisráðuneytinu 2020-2021. Frá ágúst 2021 til júlí 2024 var umsækjandinn sendiherra og fastafulltrúi Íslands gagnvart Matvæla- og landbúnaðarstofnun Sameinuðu þjóðanna (FAO), Matvælaáætlun Sameinuðu þjóðanna (WFP) og Alþjóðlega þróunarsjóði landbúnaðarins (IFAD) í Róm, Ítalíu. Hann var lögfræðingur hjá úrskurðarnefnd umhverfis- og auðlindamála í janúar til apríl 2025 og hefur starfað sem aðalsamningamaður fiskveiðisamninga hjá utanríkisráðuneytinu frá júlí 2025. Umsækjandinn var stundakennari í samningarétti við lagadeild Háskóla Íslands 1995-1996. Þá var hann stundakennari og aðjúnt í samningarétti við Háskólann í Reykjavík 2003-2005 og hafði umsjón með og kenndi árlega málstofu í evrópskum samningarétti við sama skóla árin 2006-2013. Hann hefur einnig verið próf- og ritgerðardómari við Háskóla Íslands og Háskólann í Reykjavík. Auk þessa hefur hann haldið fyrirlestra um ýmis lögfræðileg málefni í háskólum hérlandis og hefur ritað tvær ritrýndar fræðigreinar á sviði samningaréttar og einn bókarkafli.

Reimar Pétursson er fæddur 14. nóvember 1972 og er því 53 ára. Hann lauk embættisprófi í lögfræði frá Háskóla Íslands 1998 og LL.M námi við Columbia University School of Law 2003. Hann öðlaðist réttindi sem héraðsdómslögmaður 1998 og réttindi til málflutnings fyrir Hæstarétti Íslands 2004. Sama ár fékk hann lögmansréttindi í New York fylki. Hann lauk prófi í verðbréfamiðlun 2008.

Að loknu embættisprófi í lögum hóf umsækjandinn störf sem fulltrúi á lögmansstofu í Reykjavík og starfaði þar til 2003 þegar hann gerðist meðeigandi á annarri lögmansstofu í upphafi árs 2004. Umsækjandinn var sjálfstætt starfandi lögmaður á árunum 2004-2005 en varð þá lögmaður og framkvæmdastjóri hjá Fjárfestingafélaginu Atorku hf. til 2007. Þá hóf hann störf sem lögmaður í fyrirtækjaráðgjöf hjá Straumi-Burðarási fjárfestingabanka hf. og gegndi því starfi til ársins 2008. Árin 2008-2010 vann hann ýmis sérverkefni, einkum fyrir Hf. Eimskipafélag Íslands og Novator Properties Ltd, en hefur frá 2010 verið sjálfstætt

starfandi lögmaður og meðeigandi lögmannsstofu. Umsækjandi var skipaður að hoc í úrskurðarnefnd um viðskipti við fjármálafyrirtæki á árinu 2004 til meðferðar máls og var skipaður í starfshóp um afnám gjaldeyrishafta árið 2013. Frá júlí 2022 hefur hann átt sæti í dómnefnd samkvæmt III. kafla laga um dómstóla en hafði áður verið skipaður að hoc í nefndina í tvígang. Auk þess hefur hann verið formaður kærunefndar útboðsmála frá maí 2021. Þá hefur hann verið settur varadómari í Landsrétti í einu máli. Haustið 2025 sinnti hann stundakennslu í réttarfari við Háskóla Íslands. Hann hefur ritað 12 fræðigreinar, þar af eru fjórar ritrýndar, auk fjölda styttri greina um lögfræðileg efni og haldið fyrirlestra þar um. Þá var hann í stjórn Fjarskipta ehf. frá janúar 2011 til nóvember 2012 og stjórn Creditinfo Group hf. frá mars 2008 til ágúst 2011. Hann var formaður Lögmannafélags Íslands árin 2015-2018, formaður laganefndar félagsins 2013-2015 og formaður námssjóðs þess 2018-2024.

5. Mat á hæfni umsækjenda

5.1. Almenn starfshæfni og andlegt atgervi

Í 2. mgr. 13. gr., sbr. 4. mgr. 54. gr. laga nr. 50/2016 er í átta töluliðum mælt fyrir um þau almennu hæfisskilyrði sem umsækjendur um embætti dómenda og varadómenda við Endurupptökudóm þurfa að uppfylla til að skipa megí þá í embættin. Meðal þessara skilyrða eru að umsækjandi sé svo á sig kominn andlega og líkamlega að hann geti gegnt embættinu, sbr. 3. tölul. 2. mgr. 13. gr., hafi ekki sýnt af sér háttsemi, sem getur rýrt það traust sem dómara verða almennt að njóta, sbr. 5. tölul., hafi lokið embættisprófi eða grunnnámi ásamt meistaraþrófi í lögum, sbr. 6. tölul. og kafla 5.2 hér á eftir, og teljist vera hæfur til að gegna embættinu í ljósi starfsferils síns og lögfræðilegrar þekkingar, sbr. 8. tölul. Eins og áður greinir hefur ráðherra samkvæmt 3. gr. reglna nr. 970/2020 látið staðreyna að umsækjandinn uppfylli öll þessi hæfisskilyrði.

Í 3. tölulið 4. gr. reglnanna kemur fram að við mat á almennri starfshæfni skuli dómnefnd líta til þess hvort umsækjandi hafi sýnt sjálfstæði, óhlutdrægni, frumkvæði og skilvirkni í starfi og hvort hann eigi auðvelt með að skilja aðalatriði frá aukaatriðum. Þá segir einnig að umsækjandi skuli hafa góða þekkingu á íslensku máli og eiga auðvelt með að tjá sig í ræðu og riti. Enn fremur er tekið fram í 5. tölulið 4. gr.

að umsækjandi þurfi að eiga auðvelt með mannleg samskipti, bæði við samstarfsmenn og þá sem erindi eiga við hann. Gerð sé krafa um að af umsækjanda fari gott orð, bæði í fyrri störfum og utan starfa og að reglusemi hans sé í engu ábótavant.

Svo sem áður greinir var meðal annars áskilið í auglýsingu um embættið að fram kæmu í umsóknum upplýsingar um tvo fyrrverandi eða núverandi samstarfsmenn eða yfirmenn sem gætu veitt dómnefnd bæði munnlega og skriflega upplýsingar um störf og samstarfshæfni hlutaðeigandi umsækjanda. Þær umsagnir, sem nefndin aflaði hjá þessum umsagnaraðilum um störf umsækjenda og persónulega eiginleika þeirra voru jákvæðar í þeirra garð.

Af þessum umsögnum verður, eins og áður er fram komið, ráðið að umsækjendur uppfylli þær lágmarkskröfur sem gera verður til starfshæfni dómanda og varadómanda við Endurupptökudóm samkvæmt 3. og 5. tölulið 4. gr. reglna nr. 970/2020.

5.2. Menntun og framhaldsmenntun

Matthías G. Pálsson lauk embættisprófi í lögfræði frá Háskóla Íslands 1993 og LL.M. námi í Evrópurétti og doktorsgráðu í alþjóðlegum samningarétti frá Evrópuháskólanum í Flórens 2001 (sambyggð gráða). Hann lauk diplómanámi í hafrétti frá Rhodos Academy of Ocean Law 2004 og viðbótarnám í þjóðarrétti frá Columbia University í New York 2008. Í júní 2021 útskrifaðist hann með BA-gráðu í ítölsku frá Háskóla Íslands og þá lauk hann diplómanámi í umhverfis- og auðlindafræði við sama skóla í júní 2025.

Reimar Pétursson lauk embættisprófi í lögfræði frá Háskóla Íslands 1998 og LL.M námi við Columbia University School of Law 2003. Auk þess lauk hann prófi í verðbréfamiðlun 2008.

5.3. Reynsla af dómstörfum

Matthías G. Pálsson hefur ekki fengist við dómstörf.

Reimar Pétursson hefur verið settur varadómari í Landsrétti í einu máli.

5.4. Reynsla af lögmanns- og málflutningsstörfum

Matthías G. Pálsson öðlaðist réttindi til flutnings mála fyrir héraðsdómstólum 1994 og hóf sama ár störf á lögmannsstofu í Reykjavík þar sem hann starfaði sem lögfræðingur og síðar lögmaður til 1996.

Reimar Pétursson öðlaðist réttindi sem héraðsdómslögmaður 1998 og réttindi til málflutnings fyrir Hæstarétti Íslands 2004. Sama ár fékk hann lögmannsréttindi í New York fylki. Hann starfaði sem lögmaður á lögmannsstofu á árunum 1998-2005 þegar hann varð lögmaður og framkvæmdastjóri Atorku Group hf. Á árunum 2007-2008 starfaði hann sem lögmaður í fyrirtækjaráðgjöf hjá Straumi-Burðarási fjárfestingabanka hf. Árin 2008-2010 vann hann ýmis sérverkefni, einkum fyrir Hf. Eimskipafélag Íslands og Novator Properties Ltd, en hefur frá 2010 verið sjálfstætt starfandi lögmaður og meðeigandi lögmannsstofu. Hann hefur flutt fjölda viðamikilla mála fyrir Hæstarétti og Landsrétti á ýmsum réttarsviðum. Einnig hefur hann flutt mál fyrir Mannréttindadómstól Evrópu, EFTA-dómstólnum og fyrir gerðardómum.

5.5. Reynsla af stjórnsýslustörfum

Hér á eftir verða rakin helstu stjórnsýslustörf sem umsækjendur hafa haft með höndum.

Matthías G. Pálsson starfaði sem fulltrúi og þinglýsingarstjóri hjá Sýslumanninum í Kópavogi frá útskrift í október 1993 fram til mars 1994. Hann starfaði tímabundið sem lögfræðingur á EFTA-skrifstofunni í Brussel 2001 og starfaði sem sendiráðsritari á varnarmálaskrifstofu utanríkisráðuneytisins í Reykjavík fram til september 2005. Hann var sendiráðunautur og lögfræðingur við fastanefnd Íslands hjá Sameinuðu þjóðunum í New York, síðar fulltrúi Íslands í hermálanefnd Atlantshafsbandalagsins í Brussel í Belgíu í rúmt ár, 2009-2010 og í framhaldi af því sendiráðunautur og lögfræðingur í sendiráði Íslands í Brussel 2010-2014. Umsækjandinn starfaði sem lögfræðingur hjá utanríkisráðuneytinu 2014-2021 og sinnti þar fjölbreyttum störfum á sviði ráðuneytisins, meðal annars var hann fastafulltrúi Íslands gegn Evrópuráðinu í Strassborg 2018-2020 og fór fyrir samninganefnd Íslands í undirbúningsviðræðum og samningaviðræðum um gerð alþjóðlegs samnings um verndun og sjálfbæra nýtingu líffræðilegrar fjölbreytni í

hafinu utan lögsögu ríkja 2015-2021. Frá ágúst 2021 til júlí 2024 var umsækjandinn sendiherra og fastafulltrúi Íslands gagnvart Matvæla- og landbúnaðarstofnun Sameinuðu þjóðanna (FAO), Matvælaáætlun Sameinuðu þjóðanna (WFP) og Alþjóðlega þróunarsjóði landbúnaðarins (IFAD) í Róm, Ítalíu. Hann var lögfræðingur hjá úrskurðarnefnd umhverfis- og auðlindamála í janúar til apríl 2025 og hefur starfað sem aðalsamningamaður fiskveiðisamninga hjá utanríkisráðuneytinu frá júlí 2025.

Reimar Pétursson var skipaður ad hoc í úrskurðarnefnd um viðskipti við fjármálafyrirtæki á árinu 2004 til meðferðar eins máls og var skipaður í starfshóp um afnám gjaldeyrishafta árið 2013. Frá júlí 2022 hefur hann átt sæti í dómnefnd samkvæmt III. kafla laga um dómstóla en hafði áður verið skipaður ad hoc í nefndina í tvígang. Auk þess hefur hann verið formaður kærunefndar útboðsmála frá maí 2021.

5.6. Reynsla af fræðistörfum o.fl.

5.6.1. Kennsla á háskólastigi og önnur akademísk störf

Matthías G. Pálsson var stundakennari í samningarétti við Háskóla Íslands 1995-1996. Þá var hann stundakennari og aðjúnt í almennum samningarétti við Háskólann í Reykjavík 2003-2005 og hafði umsjón með og kenndi árlega málstofu í evrópskum samningarétti við sama skóla 2006-2013. Hann hefur einnig verið próf- og ritgerðardómari við Háskóla Íslands og Háskólann í Reykjavík.

Reimar Pétursson sinnti stundakennslu í réttarfari við Háskóla Íslands haustið 2025.

5.6.2. Fræðibækur og fræðigreinar o.fl.

Matthías G. Pálsson tilgreinir í umsókn sinni þrjár greinar á sviði samningaréttar og hafa tvær þeirra verið ritrýndar. Þá getur hann um einn ritrýndan bókarkafla. Einnig hefur hann haldið fyrirlestra um ýmis lögfræðileg málefni í háskólum hérlandis.

Reimar Pétursson tilgreinir í umsókn sinni 12 fræðigreinar og hafa fjórar þeirra verið ritrýndar. Hann hefur haldið fjölda fyrirlestra um lögfræðileg efni á vettvangi

félagasamtaka og háskóla, á málþingum og annars staðar. Þá hefur hann ritað allmargar styttri greinar um lögfræðileg málefni sem birst hafa í dagblöðum.

5.7. Reynsla af stjórnun

Matthías G. Pálsson var deildarstjóri alþjóða- og öryggismála á samnefndri skrifstofu 2018-2019 og fastafulltrúi Íslands gagnvart Evrópuráðinu í Strassborg 2018-2020 þar sem hann var yfirmaður annarra íslenskra lögfræðinga sem í nefndinni störfuðu. Einnig var hann yfirmaður starfsmanna á vörumerkja- og einkaleyfaumboðsskrifstofu 1994-1996.

Reimar Pétursson hefur frá árinu 2010 til þessa dags rekið eigin lögmannsstofu. Hann var á þriðja ár framkvæmdastjóri hjá Fjárfestingarfélaginu Atorku hf. Þá sat hann í stjórn Fjarskipta ehf. (nú Sýn hf.) frá 24. janúar 2011 til 9. nóvember 2012 og Creditinfo Group hf. frá 31. mars 2008 til 16. ágúst 2011.

5.8. Reynsla af öðrum störfum sem nýtast dómaraefni o.fl.

Hér á eftir verða rakin önnur störf og verkefni, sem umsækjendur hafa fengist við og nýtast myndu þeim í störfum við Endurupptökudóm að mati dómnefndar, enda hafi þeirra ekki áður verið getið, svo sem í köflum 5.5. og 5.7.

Matthías G. Pálsson hefur ekki greint frá störfum sem geta fallið undir þennan matsþátt.

Reimar Pétursson var formaður Lögmannafélags Íslands árin 2015-2018, formaður laganefndar félagsins árin 2013-2015 og formaður námssjóðs þess 2018-2024.

5.9. Sérstök starfshæfni

Í 4. tölulið 4. gr. reglna nr. 970/2020 segir m.a. að mikilvægt sé að umsækjandi hafi einkamála- og sakamálaréttarfar á valdi sínu. Einnig verði hann að geta stjórnað þinghöldum af röggsemi og sanngirni og afgreitt þau mál, sem honum eru fengin, bæði fljótt og af öryggi.

Hvað þennan þátt mats varðar hafa umsækjendur greint frá störfum sem geta fallið hér undir. Að mati dómnefndar skiptir einkum máli, þegar lagt er mat á hvort

umsækjandi hafi einkamála- og sakamálaréttarfar á valdi sínu, hver sé reynsla hans af dóms- og málflutningsstörfum og hvert sé framlag hans í formi kennslu og fræðiskrifa á sviði réttarfars sem og aðkoma hans að samningu lagafrumvarpa á því sviði.

Það er álit dómnefndar að Reimar Pétursson hafi með störfum sínum öðlast vald á réttarfarsreglum til að geta sinnt störfum dómanda við Endurupptökudóm. Þá er það álit dómnefndar að Matthías G. Pálsson hafi með fjölbreyttum störfum sínum sýnt hæfni til að geta sinnt störfum dómanda við Endurupptökudóm. Með tilliti til þeirra starfa, sem umsækjendur hafa gegnt á liðnum árum, lítur dómnefnd einnig svo á að þeir séu hæfir til að stjórna þinghöldum af röggsemi og sanngirni og muni afgreiða þau mál, sem þeim eru fengin, bæði skjótt og vel.

6. Færni umsækjenda til að semja úrskurði

Í 4. gr. reglna nr. 970/2020 er m.a. vísað til þess að umsækjandi um embætti dómara þurfi að hafa til að bera almenna og viðtæka lögfræðilega þekkingu og máli skipti hvort hann hafi sýnt sjálfstæði, óhlutdrægni, frumkvæði og skilvirkni í starfi, svo og hvort hann eigi auðvelt með að skilja aðalatriði frá aukaatriðum. Ennfremur að hann geti farið að fyrirmælum laga um samningu dóma og ritað þá á góðu máli. Eftir því sem umsækjandi hefur tileinkað sér betur þessi atriði, þeim mun færari er hann um að kveða upp dóma eða úrskurði.

Dómnefnd hefur tekið til skoðunar málflutningsskjöl og úrskurði sjálfstæðrar stjórnarsýslunefndar sem stafa frá umsækjandanum Reimari Péturssyni og ritrýndar fræðigreinar beggja umsækjendanna. Nefndin lítur svo á að þeir hafi með þessum framlögum sínum sýnt fram á að þeir sé færir um að semja dómsúrlausnir á borð við úrskurði Endurupptökudóms.

7. Niðurstaða dómnefndar

Að framan hefur verið fjallað sérstaklega um þau sjónarmið sem dómnefnd ber að líta til við störf sín skv. 4. gr. reglna nr. 970/2020. Sjónarmiðin hljóta eðli máls samkvæmt að hafa ólíkt vægi innbyrðis, en ekkert eitt þeirra getur ráðið úrslitum. Niðurstaða dómnefndar er byggð á heildstæðu og, eftir því sem kostur er, hlutlægu


mati á verðleikum umsækjanda og skiptir þar mestu máli að hann hafi til að bera almenna og víðtæka lögfræðilega menntun, þekkingu og færni.

Sem fyrr segir er Reimar Pétursson eini umsækjandinn um stöðu dómanda við Endurupptökudóm og Matthías G. Pálsson eini umsækjandinn um stöðu varadómanda við dómstólinn. Þegar litið er til þeirra matsþátta, sem fjallað er um í kafla 5 og færni umsækjendanna til að semja úrskurði sem metin er í kafla 6, er það niðurstaða dómnefndar að Reimar Pétursson sé hæfur til að gegna embætti dómanda við Endurupptökudóm. Þótt dómnefndin telji að reynsla Matthíasar G. Pálssonar af réttarfari og þá sérstaklega sakamálaréttarfari sé takmörkuð telst hann í ljósi starfsferils að öðru leyti engu að síður hæfur til að gegna embætti varadómanda við Endurupptökudóm.

Ályktarorð:

Með skírskotun til 1. mgr. 12. gr. laga nr. 50/2016 um dómstóla er það niðurstaða dómnefndar að Reimar Pétursson sé hæfur til að hljóta skipun í embætti dómands við Endurupptökudóm og Matthías G. Pálsson sé hæfur til að hljóta skipun í embætti varadómmands við Endurupptökudóm, en embættin voru auglýst laus til umsóknar 24. október 2025.


Reykjavík, 19. desember 2025


Sigurður Tómas Magnússon


Arnfríður Einarsdóttir


Hjördís Halldórsdóttir


Ragnheiður Thorlacius


Sigríður Þorgeirsdóttir